



## LAGA MUCHANAN CRECE CU STIMACION PA HIMNO Y BANDERA

Dia 18 di maart ta nos dia di himno y bandera, un dia grandi pa henter pueblo. E himno y bandera a hunga un rol importante den engradece e sentimentonan di nos poblacion di ta pertence na un pais cu tin su propio cultura, su propio custumbernan y su propio tradicionnan. Canta "Aruba Dushi Tera" y mira e bandera bula ta pone hopi hende sinti nan mes orguyoso di ta Arubiano. Ta hopi importante pa mucha lanta cu e orguyo aki: pa nan sinti cu nan ta pertenece na un pais cu su propio cultura. Mucha ta siña dor di haci y descubri y dor di sigui ehempel di adulto. Mester duna mucha oportunidad pa descubri e herencia cultural Arubiano pa alo largo nan por sigui cuid'e y engradec'e. Aki ta sigui algun idea con por laga mucha crece cu stimacion pa nos himno y bandera.

### E temporada promer cu Dia di Himno y Bandera

\* Conta bo yiunan di e origen di Dia di Himno y Bandera. Na Biblioteca Nacional bo por haya mas informacion tocante esaki.

\* Splica bo yiunan e nificacion di e colornan, e strea y e dos strepinan di nos bandera.

\* Traha hunto cu bo yiunan un lista di e bon custumbernan cu boso ta haya cu Arubianonan tin. Puntra bo yiunan pa pinta situacionnan cu ta ilustra e bon custumbernan aki, p.e. dos hende saludando otro.

\* Pidi padushi o madushi pa siña bo yiunan un cantica o poesia cu nan tabata gusta tempo nan tabata mucha. Pidi nan pa conta storia: di nan bida, di historia di Aruba, di cultura y naturalesa, con Aruba tabata antes. Tambe por pidi nan pa hunto traha un lista di palabra cu tabata usa antes y cu bo no ta tende hopi mas awendia.

\* Traha un lista di heroenan cu Aruba a conoce y den kico nan a sobresali: hendenan cu a haci cosnan bon

y cu a logra algo den, por ehempel, deporte, enseñansa, politica, literatura, etc.

### Ariba Dia di Himno y Bandera

\* Hisa bandera na cas mainta y canta cu henter famia "Aruba Dushi Tera". Atardi, promer cu baha e bandera, ta canta atrobe.

\* Siña bo yiunan prepara cos di come of bebe tipico, por ehempel, pan bati of frijo di sorsaca.

\* Prepara hunto cu bo yiunana un comemento di platonan tipico.

### Pa otro diano di aña

\* Tuma un cierto proposito pa haci durante aña cu lo fortifica bon custumber Arubiano, por ehempel, crea den bo famia e custumber pa un bez pa siman come un cuminda tipico.

\* Muestra aprecio pa logronan di Arubianonan: artistanan local, bon programa educativo na radio of television, bon trabou di polis y pa otro hende cu ta traha na bienestar di nos comunidad. Splica pakico e logronan aki ta importante pa nos cultura y nos pais. Por laga e muchanan scirbi e persona cu nan tin aprecio pe un carta pa muestra nan aprecio.

\* Mantene contacto regular cu hende grandi den famia of den bario pa bo yiunan por siña cierto norma y balor di antes y pa nan tende storianan di antes.

\* Laga bo yiunan lesa buki di escritornan Arubiano. Si na ta chikito ainda bo por lesa storia y poesia di escritornan Arubiano pa nan.

\* Bishita exposicionnan di pintornan local.

\* Bishita y/of participa na actividadnan cultural.

\* Bishita e diferente museonan cu tin na Aruba:

Museo Arubano na Zoutmanstraat  
Museo Archeologico na Irausquinplein 2-A

Museo Numismatico na Weststraat  
Museo Deportivo Arubano na Alto Vista 67



Museo Antigüedad Aruba na Timalstraat 11

\* Siña muchanan weganen di antes. Si bo mes no sa di nan bo por pidi hende grandi pa informacion.

\* Planta simia di matanan tipico di Aruba, por ehempel, Otaheiti y Barba di Joncuman. Por haya simia na Sta. Rosa caminda nan por duna mas informacion di matanan local.

\* Laga bo yiunan conoce tur e lamanan di Aruba y bishita Parke Nacional Arikok cu nan.


\* Bishita e diferente atracionnan turistico, por ehempel, cuebanan, Hooiberg, Natural Bridge, etc.

\* Stimula bo yiunan pa cuminsa un coleccion di stampia di Aruba. Tin un seccion special na Postkan-

toor cu por duna informacion tocante stampianan cu a sali na Aruba despues di "Status Aparte".

\* Participa na caminatanan organisa pa Stimaruba of otro organizacionnan y haya sa mas tocante mata, palo y parha di Aruba y sitionan special den naturalesa. Despues bo por conta bo yiunan di esakinan. Si tin caminatanan cu mucha tambe por participa aden ta bon pa bai cu bo yiunan.

Ta importante pa adultonan mantene e herencia cultural di Aruba bibo y percura pa futuro generacion por conserv'e y engradec'e. Fundacion Pa Nos Muchanan ta desea tur famia y pueblo en general un feliz Dia di Himno y Bandera.



Muchanan con ta bai. Manera tur aña riba 18 di Maart nos ta celebra nos dia di Himno y Bandera. E aña aki lo bai tin diferente actividad tanto pa boso como pa boso mayornan. Nos mester ta orguyoso di nos Himno, Escudo y nos Bandera. Dor di nos bandera nos pais por wordo reconoce rond mundo y na tur actividad internacional unda Aruba ta participa nos dushi himno ta wordo canta.

#### NOS HIMNO

Nos himno a wordo traha dor di dos musico masha grandi di Aruba.

Tabata un mainta na aña 1952 cu Rufo Wever y Padu Lampe a dicidi di sinta hunto pa traha un cantica.

Nan tabatin e custumber di traha hunto caba, pero e dia ey nan kier a raha un cantica masha special; un cantica cu ta expresa stimacion di pueblo di Aruba pa su isla.

Hunto nan a crea loke awor ta nos himno: ARUBA DUSHI TERA.

Nan a pensa e palabranan y e musica pa e cantica cu nos ta canta. E tempo ey no tabata facil pa graba un cantica. Ta te na aña 1954 un coro di mucha, De Trupialen, a graba "ARUBA DUSHI TERA" riba disco. Asina tur hende por a tende e cantica na radio.

Pueblo a gusta e cantica y e hendenan a cuminsa us'e na ocasionnan official.

Mas cu binti aña despues Gobierno di Aruba a dicidi cu Aruba mester haña su himno official. E cos di mas bunita cu nan a haci ta duna honor na e cantica "ARUBA DUSHI TERA" cu tur hende a acepta y a stima.

Dia 16 di Maart 1976, despues cu nan a pone un couplet acerca, "ARUBA DUSHI TERA" a bira **NOS HIMNO**.

#### NOS BANDERA

Cada bes cu nos bandera bai halto nos mester sinti nos orguyoso. E bandera ta corda nos cu nos ta jiu di Aruba.

Na aña 1976 Gobierno di Aruba a organisa un concurso unda tur hende por a participa y pinta un bandera y for di e pinturanan aki lo scohe esun cu lo bira e bandera di Aruba. E concurso aki tabata un exito ya cu casi 700 pintura a wordo entrega. Hopi di nan tabatin un strea cu cuater punta. Tambe hopi bandera tabatin strepi di color. E coloman mas usa tabata cora, blanco, blauw y geel.

Un experto mericano a yuda pinta un bandera cu tin e colornan, nificacion y balor cu mayoria di e participantenan na e concurso a desea.

Esaki a bira e bandera oficial di nos pais ARUBA.

Nos bandera a bai laira pa prome biaha dia 18 di Maart 1976.

#### NOS ESCUDO

Antes e soldadnan tabata usa un plachi di hero pa proteha nan mes contra hinca di spada y lanza. Un plachi di hero asina nos ta yama un 'escudo', 'schild' na hulandes.

Despues di tempo hopi pais a laga traha un escudo special pa representa nan pais. E escudo aki nan tabata dorna cu pintura cu tin nificacion pa e pais.

Nos escudo ta e prome simbolo nacional cu Aruba conoce. Esey kiermen cu Aruba tambe a laga traha un escudo special pa representa nos pais.

Gobierno a scohe e escudo cu un grupo di pintor Hulandes a pinta. E escudo aki a bira official dia 15 di November 1955.

Riba papel official di Gobierno hopi biaha bo ta mira nos escudo, anera riba cedula y rijbewijs. Tambe bo por mir'e riba nos monedanan.

